

中國方志叢書·華中地方·第四八號

據 宋·周淙撰清·錢保塘札記
清·光緒四年重刊本 影印

浙江省

乾道臨安志



成文出版社有限公司印行

01192-5



10097743

中華民國五十九年三月十一日

乾道臨安志

全一冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市羅斯福路三段279之二號

電話：三三〇一三三二號

印刷者：東南印製廠有限公司

和平西路二段70巷83弄29號

內政部登記證內版台業字第一一四七號

欽定四庫全書

光緒四年冬
會稽章氏刊

直齋書錄解題臨安志十五卷府帥周滌彥廣撰首卷
爲行在所於宮闕殿閣全不記載藉曰禁省嚴祕不敢
明著其視宋次道東京記何其大不侔其他沿革亦多
疏略然滌有才具其尹京開湖濬河皆有成緒今城中
河道通利民戶爲腳船以濟行旅者蓋自此始

四庫全書總目乾道臨安志三卷宋周滌撰滌字彥廣
湖州長興人乾道五年以右文殿修撰知臨安府創爲
此志原本凡十五卷見宋史藝文志其後淳祐閒施鏐
咸淳閒潛說友厯事編纂皆有成書今惟潛志尙存鈔
帙周施二志世已無傳此本爲杭州孫仰曾家所藏宋
槧本卷首但題作臨安志而中間稱高宗爲光堯太上

皇帝稱孝宗爲今上紀牧守至淙而止其爲乾道志無疑惟自第四卷以下俱已闕佚所存者僅十之一二爲可惜耳第一卷紀官闕官署題曰行在所以別於郡志體例最善後潛志實遵用之二卷分沿革星野風俗州境城社戶口廨舍學校科舉軍營坊市界分橋梁物產土貢稅賦倉場館驛等諸子目而以亭臺樓觀閣軒附其後敘錄簡括深有體要三卷紀自吳至宋乾道中諸牧守詳略皆極得宜涉尹京時撩湖浚渠頗留心於地利故所著述亦具有條理今其書雖殘闕不完而於南宋地志中爲最古之本考武林掌故者要必以是書稱首焉

長興周淙彥廣撰臨安志十五卷直齋書錄譏其首卷
爲行在所於宮闕殿閣全不記載其他沿革亦多疎略
此書世所罕傳萬厯中吾郡陳布政善修府志時已不
得見孫君晴厓得宋槧本於京師故家祇一卷至三卷
所載園亭坊巷及職官姓氏爲潛君高咸淳志藍本其
他惜無從更覓然斷珪殘璧爲此邦文獻計已不啻寶
如圖球志稱乾道三年五月二十六日以右朝請大夫
直龍圖閣兩浙轉運副使知臨安府先是紹興五年嘗
通判府事宋史本傳但言宣和間以父任爲郎歷官至
通判建康府志稱乾道四年十月十四日磨勘轉右朝
議大夫五年七月初四日除右文殿修撰再任本傳但

言進右文殿修撰提舉江州太平興國宮以歸無再任
臨安事此可以補史之闕咸淳志載淙濬湖撩草諸善
政孝宗手敕獎諭本傳但言其開河一事亦似過略堇
浦杭世駿跋

乾道臨安志十五卷宋臨安府尹吳興周淙彥廣所修
也此宋槧本僅一卷至三卷無序目可稽觀其稱孝宗
爲今上紀職官至淙而訖其爲乾道志無疑吾郡志乘
之有名者北宋圖經久已無攷至南渡建爲行都則此
志居首繼之以施愕淳祐志潛說友咸淳志皆爲宋人
排纘予所見者祇有咸淳志百卷向在花山馬氏吳君
尺鳧鈔藏尙缺七卷趙君谷林復購得宋槧本之半固

以珍如球璧今孫君晴厓從都下獲此志雖僅十之一
二當時宮闕官署城中橋梁坊巷具存職官始末更爲
詳晰諸家儲藏著錄未有及此者淙尹京時撩湖濬渠
綽有政績載在宋史其書更可寶也亟錄副本而歸之
樊榭厲鶚跋

吳壽暘拜經樓藏書題跋記乾道志鈔本止三卷每葉
二十行行十九字先君子以錢氏萃古齋新鈔本校錢
氏本每葉十八行行二十字

吳壽暘爲海甯吳
兔牀明經騫子

周淙彥廣乾道臨安志十五卷今僅存三卷 四庫所
錄卽杭州孫仰曾家藏本也道光戊戌三月海昌蔣生
光煦以舊鈔本見贈六月初旬假蔣生所藏陸香圃三

間草堂鈔本及吳氏拜經樓鈔藏本謹校一過拜經藏
本與此大略相同三間草堂本似稍勝疏其異同以俟

裁定海甯州學訓導錢泰吉謹校上此跋上桐城姚伯昂總憲見所著曝

書雜記
卷中

乾道臨安志卷第一

吳興周淙彥廣撰

行在所

宮闕 門附

大內在鳳凰山之東以臨安府舊治于城增築南曰麗

正門

門外建東西闕亭百官待漏院

北曰和甯門

門外建百官待漏院

東曰東華

門建炎中車駕南巡駐蹕於此紹興七年二月降詔巡

幸建康府紹興八年三月移蹕臨安府下詔曰昔在光

武之興雖定都於洛而車駕往反見於前史者非一用

能奮揚英武遞行天討上繼隆漢朕甚慕之朕荷祖宗

之休克紹大統夙夜危懼不常厥居比者巡幸建康撫

綏淮甸既已申固邊圉獎率六軍是故復還臨安內修
政事繕治甲兵以定基業非厭霜露之苦而圖宮室之
安也故茲詔諭想宜知悉

德壽宮在望仙橋之東

宮門外有百官待漏院

紹興三十二年六

月四日奉聖旨以德壽宮爲名是月十一日光堯壽聖
太上皇帝降詔退處是宮其日今上皇帝登寶位

皇子府

慶王府

恭王府

右在德壽宮北

宗廟 橫宮附

太廟在瑞石山之左

景靈宮在新莊橋之西

崇禮館道院
在宮之南

安穆安恭皇后櫝宮在錢湖門外三里修吉寺

莊文太子櫝所在錢湖門外二里寶林院

郊社

園壇在嘉會門外以南四里三歲一郊天

熙成殿 在壇側

太社太稷壇在觀橋東北每歲春秋祀社稷

九宮壇在東青門外一里歲祀九宮貴神

藉田在先農壇嘉會門外以南四里玉津園之南紹興十五年十一月十七日詔以來歲之春祇祓青壇親載

耒耜躬三推之禮以風示於四方明年孟春二十有二日太上躬耕藉田禮成自後歲祀先農於此

高禘壇在嘉會門外以南四里龍華寺歲祀高禘

三省

尙書省

六部

中書省

後省

門下省

樞密院

承旨司

以上在和甯門外之北

臺閣

龍圖天章寶文顯謨徽猷敷文閣在和甯門裏

御史臺在清和坊之西

秘書省在天井巷之東

光堯太上皇帝御書右文殿曰右文之殿門曰右文殿門

實錄院

日厯所

右附於秘書省

學校

太學紹興十二年四月二十一日奉聖旨太學養士權於臨安府學措置增展其格法令禮部討論繼而於前洋街建立十四年三月己巳光堯太上皇帝祇謁先聖止輦於大成殿門外降登步趨執爵奠拜注視貌象翼翼欽慕復幸太學御敦化堂頒手詔示樂育詳延之誠

意命國子司業高閎講周易泰卦賜羣臣諸生坐垂聽
講說首肯者再三復迂玉趾俯臨養正持志二齋顧瞻
生徒肄業之所徘徊久之始命駕言還乾道五年奉聖
旨令兩浙轉運司臨安府重修殿宇

光堯太上皇帝御書至聖文宣王廟曰大成之殿門
曰大成殿門

光堯太上皇帝御書御書閣牌曰首善之閣藏光堯
太上皇帝御書石經

敦化堂

米友仁
被旨書

齋舍

服膺

視身

守約

習是

養正

存心 節性 持志 率履 誠意

經德 允照 循理 時中 愷信

果行 務本 貫通 觀化 立禮

武學在前洋街紹興十六年四月初二日奉聖旨令兵部討論武士弓馬及試選去留格法申尙書省二十六年奉聖旨令禮兵部檢會祖宗以來武學養士典故施行乾道五年奉聖旨令兩浙轉運司臨安府重修殿宇

昭烈武成王殿

敦閱堂

齋舍

受成 貴謀 輔文 中吉 經遠

閱禮

諸王宮大小學在睦親宮之右

貢院在觀橋之西

別試所在貢院之側

經筵

講筵所

資善堂

講筵閣

以上並在禁中

宮觀

太一宮在新莊橋之南

崇真館道院在宮之南

萬壽觀在新莊橋之西

晨華館道院在觀之東

四聖延祥觀在孤山紹興十六年建二十年賜今額道院

在觀之北

三茅甯壽觀在城中七寶山紹興十六年賜今額

顯應觀紹興十九年於龍山西建立二十四年徙於湧

金門外靈芝寺之右

旌忠觀紹興元年宣撫處置使張浚劄子據吳玠陳請

陝西出兵自來祈禱三聖屢獲顯應乞於鳳翔府和尙

原立廟賜旌忠廟額封忠烈靈應王忠顯昭應王忠惠

順應王三年張浚楊存中郭仲荀用已俸於臨安府踏

道橋東立廟紹興十九年改賜觀額三十二年徙於覺

苑寺故基

廟宇

祚德廟在車橋西紹興二十二年二月二十一日奉聖旨令兩浙轉運司蓋造

苑囿

玉津園在龍山之北

聚景園在清波門外

院

諫院在三省後

學士院在和甯門裏

登聞檢院在麗正門外

登聞鼓院在麗正門外

官告院在尙書吏部中門

都進奏院在朝天門外

諸司糧料院在壽域坊之北

諸軍糧料院在壽域坊之北

文思院上下界在北橋之東

車輅院在嘉會門外

騏驥院在紫坊嶺下

六房院在三橋之西

五房院在紅橋之西

所

玉牒所在朝天門之南

勅令所舊在天井巷今徙於朝天門之南

軍器所在祥符寺之東

三衙

殿前司在八盤嶺南

侍衛馬軍司在天慶坊

侍衛步軍司在鐵冶嶺

寺監

太常寺在天井巷舊勅令所

宗正寺附於大
宗正司

大理寺在仁和縣西

司農寺在市南坊之北

大府寺在通江橋之東

國子監事具學校

將作監在修文坊

軍器監在修文坊

司

大宗正司在睦親坊

軍頭引見司在文思院後

左右金吾衛仗司在吳山

諸司審計司在淨因坊之北

諸軍審計司在淨因坊之北

牛羊司在權貨務後

排岸司在武學相對

內諸司

閣門

客省四方館

右在和甯門外

入內內侍省

禁衛所

皇城司

御藥院

御輦院

御前馬院

內東門司

翰林院

天文局醫官局
鐘鼓院隸焉

修內司

御廚

通進司

儀鸞司

翰林司

後苑

合同憑由司

內軍器庫

內藏庫

御酒庫

右並在禁中

倉

省倉上界在天水院橋之北

中界在仁和縣橋之東

下界在餘杭門外九里


豐儲倉在東青門外三里

場

權貨務都茶場在通江橋之東

雜買務雜賣場在通江橋之西

皇朝通志卷一百一



草料場在天水院橋之北
糯米糴場在德勝橋之北

庫

左藏庫在清湖橋之西

御酒麪料庫在後市街

祇候法物庫在糯米倉巷

度牒庫在油車巷

贍軍南酒庫在朝天門外有和樂樓

東酒庫在柴垛橋之東有大和樓

北酒庫在鹽橋之東

西酒庫在三橋之西有豐樂樓

中酒庫在灞頭市之西

南外酒庫在候潮門外

北外酒庫在江漲橋鎮

局

太醫局在葛公橋之南

和劑局在臨安府治後

太平惠民南局在太廟之南

太平惠民北局在灞頭市

太平惠民西局在眾安橋

太平惠民東局在浙江

太史局在吳山

編估打套局在太府寺後

府第

左右僕射府在壽域坊南

樞密知院府在天慶坊

執政府在天慶坊

嗣濮王府在軍將橋之東

吳王府在後洋街

益王府在中沙巷

睦親坊在清湖橋之東

臺諫宅在太常寺西

百官宅在石灰橋

館驛

都亭驛在候潮門裏

國信所附之

懷遠驛舊在法慧寺今廢

班荆館在赤岸港

軍營

禁衛諸班直營

一在天慶坊一在保民坊一在崇新門裏一在艮山門裏

皇城司親從親事等指揮營在豐樂橋東

捧日天武龍神衛等指揮寨并殿前司馬步軍三司諸

軍寨並環列於府城內外東至外沙西至西溪安樂山

南至龍山北抵江漲橋鎮

御輦院供御次供御下都輦官營在崇新門裏

儀鸞司營

一在保安門裏
一在麗正門外

翰林司營在鹽橋南

御廚營

一在天慶坊
一在報恩寺

修內司壯役等指揮在萬松嶺下

軍器所萬全東西作坊等指揮營在大理寺西

軍頭司等子營在文思院後

驥驥院教駿營在紫坊嶺下

乾道臨安志卷一

乾道臨安志卷第二

歷代沿革

大都督臨安府餘杭郡甯海軍節度

治錢塘仁和二縣

禹貢揚

州之域春秋時屬吳吳滅入越越滅入楚秦并天下屬

會稽郡

太平寰宇記夏禹東去捨舟航登陸於此乃名餘杭吳越春秋夫差二十三年止於餘杭山史

記始皇三十七年十一月過丹陽至錢塘臨浙江西一百二十里從狹中渡顧夷曰始皇過餘杭因為縣焉

漢因之

西漢地理志有餘杭錢塘富春縣又海鹽縣武原鄉有鹽官沈約宋書曰鹽官漢舊縣也至

東漢順帝之後隸吳郡

東漢地理志吳郡有餘杭三國富春城丹陽郡有於潛城

時屬吳吳大帝分餘杭置臨水縣

吳志賀齊表奏分餘杭為臨水縣黃

武五年即富春縣置東安郡

吳志云分三郡十縣地又置東安郡以全琮為守

分富春置新城縣既而廢

寶鼎二年割於潛屬吳興郡

晉太康元年

改臨水縣爲臨安縣時鹽官錢唐富陽

晉武帝避簡文鄭太后諱改春

日隸吳郡臨安餘杭於潛隸吳興郡

事見晉地理志

咸和中復

置新城縣宋齊梁因之陳置錢塘郡隋開皇九年平陳

廢郡割吳興吳郡之地置杭州初治餘杭未幾移治錢

塘省并新城臨安縣仁壽二年割武康縣屬杭州因置

總管府大業初改爲餘杭郡統縣六

隋地理志云錢塘富陽餘杭於潛鹽

官武

唐武德六年六月復爲杭州隸蘇州總管是年沒

於輔公祐七年平賊復置杭州因并鹽官入錢塘以武

康隸湖州陸於潛縣爲潛州八年州廢以舊縣來屬貞

觀元年分天下爲十道杭州隸江南東道四年分錢塘

復置鹽官凡領縣五

錢塘富陽餘杭於潛鹽官

隸潤州都督府永淳

元年析富陽復新城縣垂拱二年析於潛置紫溪縣四

年析餘杭復臨安縣萬歲通天元年改紫溪為武隆聖

歷元年又改為武崇神龍元年改為唐山今昌化縣也

長慶之後復置景雲二年屬江南道按察使開元二十一年分

隸江南東道採訪使天寶元年改為餘杭郡統縣八

唐志云錢塘富陽餘杭於潛鹽官新城臨安唐山至德二載置江東防禦使治餘

杭郡乾元元年復以為杭州置浙江西道節度治昇州

尋徙蘇州未幾兼餘杭軍使治杭州二年改置觀察使

治蘇州上元二年詔杭州刺史領防禦使建中二年置

鎮海軍節度於潤州元和之後使名廢置不常龍紀元

年復置杭州防禦使景福元年賜號武勝軍防禦二年

年復置杭州防禦使景福元年賜號武勝軍防禦二年

陞為都團練觀察尋廢移鎮海軍節度使治杭州已上使名

歲次並見唐方鎮表五代史記云光化元年移鎮海軍於杭州景福二年至光化改元相去凡五年不同是

年始拜錢鏐為節度使俄而置都督府又陞為大都督

府天祐四年以臨安縣衣錦城為安國衣錦軍朱梁開

平元年改新城為新登以梁太祖父諱改城曰登二年改臨安為安

國事見五代史記四年改唐山為金昌龍德三年析錢塘鹽官

地置錢江縣今仁利縣也與錢塘分治城下後唐同光初復

金昌為昌化石晉改為橫山又以為吳昌五代之亂錢

氏據有兩浙幾百年號吳越國宋興錢俶始事貢獻太

平興國三年朝於京師遂納土焉其年改錢江為仁和

復新登為新城陞安國衣錦軍為順化軍治臨安縣四

年改吳昌爲昌化五年廢順化軍以其縣復隸杭州淳

化五年詔以鎮海軍爲甯海軍詔曰浙右奧區餘杭故壤間閭舊俗有延陵廉

遜之風組練雄師知孫武訓齊之令控於滄海實曰大藩宜更節制之名用治底甯之化杭州鎮海軍改爲甯

軍海陞南新場爲昭德縣六年改爲南新縣領縣十皇祐

元年管勾一路兵馬鈐轄司事熙甯五年廢南新爲鎮

隸新城縣七年分浙東西爲兩路杭蘇湖潤常秀睦七州爲西路宣和

中領浙西安撫使建炎三年翠華巡幸是年十一月三

日陞杭州爲臨安府復兼浙西兵馬鈐轄司事統縣九

錢塘仁和餘杭臨安富陽於潛新城鹽官昌化紹興五

年三月二十四日指揮臨安府車駕駐蹕之地宜增重

事權依舊兼浙西安撫使云

星度分野

周禮保章氏以星土辨九州之地所封之域皆有分星以觀妖祥注云星紀吳越也史記天官書漢書天文志皆云牽牛婺女揚州地理志云吳地斗分野也晉書天文志隋書地理志皆云自南斗十二度至須女七度爲星紀於辰在丑吳越之分野屬揚州費直起斗十度蔡邕起斗六度故永嘉中歲星熒惑太白聚斗牛女之間識者以爲吳越之地當興王者又苻堅欲謀爲寇石越對曰今歲星鎮斗牛福德在焉垂象弗差苻融曰歲鎮在斗牛吳越之福五代史云唐末豫章人有善術者望斗牛間有王氣牛斗乃錢塘分野

國史地理志兩浙路當天文南斗須女之分

風俗

吳地古揚州之境也其俗躁勁揚輕故曰揚州或曰州界多水水波揚也周官職方氏曰揚州之民二男而五女其畜宜鳥獸其穀宜稻吳越春秋云人性脆而愚水行山處以船爲車以楫爲馬悅兵而敢死漢志曰吳粵之君皆尙勇故其民好用劔輕死易發文身斷髮以避蛟龍之害

應劭曰常在水中故斷其髮文數與楚接戰

其身以象龍子故不見傷害也互相兼并故吳越風俗略與楚同隋志曰江南之俗火耕水耨魚稻富饒不憂飢餒信鬼神喜淫祀又曰吳郡餘杭川澤沃衍有海陸之饒珍異所聚商賈並湊其人

國史地理志總敘兩浙路以爲性敏柔而慧尙浮屠氏
之教厚於滋味急於進取善於圖利

君子尙禮庸庶敦龐故風俗澄清而道教隆洽亦其風
氣所尙也

州境

通典太平寰宇記皆云杭州乃春秋越國之西境西北
至禦二作兒語分界在吳郡嘉興縣南今秀州崇德縣有
禦兒鄉是也又周顯王四十六年楚威王伐越破之盡
取其地至於浙江之北

東西六百六十七里一百三十六步

南北九十九里三十三步

四至八到

東至秀州界一百二十九里自界首至本州一百二十里

西至徽州界二百四十三里自界首至本州九十里

南至紹興府界三十六里自界首至本府九十里

北至湖州界五十四里自界首至本州一百八里

東南到紹興府界三十六里自界首至本府一百三十五里

西南到嚴州界一百五十三里自界首至本州一百一十一里

東北到秀州界九十三里自界首至本州九十七里

西北到宣州界一百九十八里自界首至本州二百一
十里

去兩京地里

東京二千二百里

西京二千五百里

陸路

西至昱嶺二百四十三里入徽州界

北至導墩五十四里入湖州界

東北至七里店九十三里入秀州界

西北至千秋嶺一百九十八里入宣州界

南至白峯鋪一百五十三里入嚴州界

水路

東至浙江沿海郭瀝港一百二十九里入秀州界

南至浙江中流三十六里入紹興府界

北至下塘大港導墩五十四里入湖州界

東北至上塘運河七里店九十三里入秀州界

東南至浙江中流三十六里入紹興府界

西南自浙江入溪至白峯一百五十三里入嚴州界

縣

望錢塘

望仁和

望餘杭

望臨安

緊富陽

緊於潛

上新城

上鹽官

中昌化

鎮

江漲橋鎮

臨平鎮

范浦鎮

右並端拱元年置隸仁和縣

湯村鎮

右本仁和鎮端拱元年改隸仁和縣

南新鎮

右熙甯五年置隸新城縣

在城入廂

吏部注大小使臣分治烟火賊盜公事

宮城

左一

左二

左三

右一

右二

右三

右四

城南北兩廂

紹興十一年五月七日郡守俞侯奏請府城之外南北相距三十里人烟繁盛各比一邑乞於江漲橋浙江

置城南北左右廂差親民資序京朝官主管

城南左廂

本廂公事杖六十以下罪聽決奉聖旨依舊治便門外一里浙江跨浦橋北今徙於白壁營

城北右廂

治餘杭門外六里江漲橋鎮

城東西都巡檢使

乾道三年四月二十日郡守王炎奏請以城外東西

廂地分廣闊巡邏稀疎乞於見任官內踏逐有武勇之人二員兼城東西巡檢使各差軍兵三十人帶器仗巡警措置賊盜奉聖旨依

城東都巡檢使司

治城東一里羅漢院之南

城西都巡檢使司

治城西三里赤山之南

城社門附

九域志隋楊素剏州城周回三十六里九十步有城門

十二東曰便門保安崇新東青艮山新門西曰錢湖清

波豐豫錢塘南曰嘉會北曰餘杭有水門五東曰保安

南水西水北曰天宗餘杭資治通鑑載唐景福二年錢

軍士築杭州羅城周七十里南門曰龍山東門曰竹車

南土北土保德北門曰炭橋新門曰

有門曰朝天門曰炭橋新門曰

鹽橋門今廢土人猶以門稱焉

社壇舊在利涉門內今嘉會門一百步今徙於城西一里昭

慶寺

戶口

自陳置錢塘郡隋廢郡為杭州戶一萬五千三百八十

唐貞觀中戶三萬五百七十一口一十五萬三千七百

二十九開元中戶八萬六千二百五十八太平寰宇記

載皇朝初戶主六萬一千六百八客八千八百五十七

九域志戶一十六萬四千二百九十三客三萬八千五百二十三

兩朝國史戶二十萬五千五百六十九今戶二十六萬一千六百九十二口五十五萬二千六百七

廨舍

府治舊在鳳凰山之右子城南曰通越門北曰雙門錢氏

舊造至和元年郡守資政殿學士給事中孫沔重建樞密直學士蔡襄撰記并書刻石於門之右建炎

四年翠華駐蹕今徙治清波門之北以奉國尼寺即淨因寺

故基創建

兩浙轉運衙太平興國三年錢氏納土是年五月丙戌始置轉運使以刑部郎中楊克遜充兩浙西南路轉運

使宗正寺丞趙齊副之祠部郎中劉保勛充兩浙東北
 路轉運使右拾遺鄭遜副之熙甯七年四月癸巳檢正
 中書刑房公事沈括言欲乞分浙東西為兩浙路轉運
 使於杭州置司杭蘇湖常秀睦潤七州為浙西路詔從
 之舊治在雙門之北為東北兩衙今徙於湧金門南為
 轉運東西兩衙

提舉市舶衙舊在城中淳化三年四月庚午移杭州市
 舶司於明州定海縣以監察御史張肅領之今存市
 舶務

通判南廳在府衙南

通判北廳在府衙東

安撫司參議官主管機宜文字幹辦公事廨舍在府治

之左右

僉判察判節推察推司戶司法教授廨舍並在府治之

左右

府院在府衙門之西

鐵事參軍廨舍附之

左司理院在府衙之東

司理參軍廨舍附之

右司理院在府衙之西

司理參軍廨舍附之

學校

至聖文宣王廟舊在府治之南子城通越門外有稽古

閣奉安御書宣和中本路廉訪使降御書殿榜曰大成

錢塘仁和縣學附焉

六經齋十二

經德

進德

炳文

允習

頤正

賁文

蒙養

時升

益明

履信

復古

賓賢

建炎以來遷徙不常紹興元年於凌家橋東以慧安寺故基重建

六齋

經德

敦厚

彌新

升俊

富文

賁文

科舉

舊制三歲應詔解七人崇甯頒三舍法於學歲貢七人宣和五年復科舉三歲解十四人紹興二十六年增西

北流寓解額三人今解十七人

軍營 兵籍附

禁軍

東南第三將自錢氏納土之後准朝廷處分屯駐

劄寨在東青門裏有正副將各一員押隊官二員原管步軍

九指揮大觀四年三月奉聖旨撥威果第二十八雄

節第九指揮往平江府駐劄宣和二年因討睦州方

寇准殿前司備奉指揮撥到威捷第一指揮馬軍并

全捷第二第三指揮步軍並屬本將駐劄共見管八

指揮原額四千八十八人

威捷第一指揮 原額五百

威捷第四指揮

威果第五指揮

威果第六指揮

雄節第八指揮

雄節第十六指揮

全捷第二指揮

全捷第三指揮

以上額同

京畿第二將元係東京畿縣陳留雍邱尉氏鄆陵陽武
屯駐人兵建炎元年十一月准樞密院劄子差隨統領
劉俊前來杭州收捕陳通續准樞密院劄子備奉聖旨
存留本將人馬在杭州就糧駐劄營寨在東青門裏有正副將

各一員押隊官三員共管一十六指揮元額七千六百六十八

武騎第二指揮 元額四百一十八

武騎第六指揮

廣勇左一四指揮

廣勇左一五指揮

廣勇左一六指揮 以上額同

廣捷第四指揮 元額五百一十八

廣捷第五指揮

廣捷第六指揮

捷節第五指揮

驍猛第一指揮

神威第九指揮

雄勇第二指揮

雄威第六指揮

効忠第二十四指揮

効忠第七十五指揮

効忠第七十七指揮 以上額同

兵馬鈐轄司軍兵內雄節威果全捷三指揮於熙甯三年以後招置宣和二年分撥宿州屯駐軍龍騎歸遠二指揮軍兵前來討捕睦州方寇續准指揮留屯於杭州營寨在東青門外 係本府兵馬鈐轄管轄共管五指揮原額二

千五十人

雄節第七十指揮

元額四百一十人

威果第六十一指揮

全捷第十七指揮

龍騎指揮

歸遠指揮

以上額同

諸寨土軍一十三處原額共管一千三百六十六人

外沙巡檢司寨在候潮門外

元額管土軍一百二十人

海內巡檢司寨在嘉會門外

同

管界巡檢司寨在餘杭門外

同

茶槽巡檢司寨在東青門外

同

南蕩巡檢司寨在錢塘縣界元額管土軍九十六人

東梓巡檢司寨在富陽縣界元額管土軍一百二十人

上管巡檢司寨在鹽官縣界元額管土軍一百二十人

赭山巡檢司寨在仁和鹽官兩縣界同

黃灣巡檢司寨在鹽官縣界同

硤石巡檢司寨在鹽官縣界元額管土軍一百人

奉口巡檢司寨在錢塘仁和縣界同

許村巡檢司寨在鹽官縣界同

下塘巡檢司寨在仁和縣界元額管土軍三十人

廂軍

崇節第一指揮額管五百人

崇節第二指揮 額同

崇節第三指揮 額同

崇節第四指揮 額同

崇節第五指揮 額管四
百人

崇節第六指揮 額同

捍江第一指揮 額同

捍江第二指揮 額同

捍江第三指揮 額同

捍江第四指揮 額同

捍江第五指揮 額管四
百人

修江指揮 額管一百
二十人

都作院指揮

額管四百人

小作院指揮

額管一百人

清湖閘指揮

額管七百人

開湖司指揮

額管二百人

北城堰指揮

額管二百人

西河廣濟指揮

額管三百人

樓店務指揮

額同

長安堰閘指揮

額管一百人

秤斗務指揮

額管四十八人

北城指揮

額管三百人

鼓角匠指揮

額管二十五人

橫江水軍指揮 額管二十四人

船務指揮 額管二百八十人

牢城指揮 無額 乾道五年八月分軍 籍見管八百二十四人

坊市

左一廂

市西坊 灞西巷

市南坊 巾子巷

太平坊 新街巷

融和坊 肉市巷

清河坊 清河坊巷

吳山坊 吳山井巷

回濤坊 吳山井後巷

通浙坊 天井巷

徑山坊 峨眉山巷

大隱坊 都酒務巷

淨因坊 樓店務巷

豐豫坊 府學巷

善化坊

竹園山巷

懷慶坊

寶月山巷

左二廂

修義坊

凌椒薑巷

樂眾坊

南棚巷

教睦坊

銀甕後巷

積善坊

上百戲巷

秀義坊

下百戲巷

壽安坊

官巷

修文坊

修文巷

里仁坊

陶家巷

保信坊

剪刀股巷

定民坊

中棚巷

睦親坊

官巷

純禮坊

後洋街巷

保和坊

輒街巷

報恩坊

觀巷

左三廂

欽善坊

開扇子巷

甘泉坊

相國井巷

清風坊 活水巷

興慶坊 前洋街巷

德化坊 木子巷

右一廂

孝仁坊 清平山巷

貴恕坊 相府巷

壽域坊 糧料院巷

保甯坊 太廟巷

天慶坊 天慶觀巷

保民坊 吳山廟巷

長慶坊 竹竿巷

懷信坊 總糴巷

常慶坊 柴垛橋巷

右二廂

清平坊 沙皮巷

興禮坊 清泠橋巷

通和坊 金波橋巷

延福坊 壩東巷

蘭陵坊

水巷

義和坊

炭橋巷

武志坊

李博士橋巷

戒民坊

棚橋巷

新安坊

小新橋巷

延定坊

鷺鴨橋巷

祈祥坊

北橋巷

懷遠坊

軍頭司巷

普甯坊

清遠橋巷

同德坊

燈心巷

教欽坊

竹竿巷

嘉新坊

十郎堂巷

招賢坊

仁和縣巷

安國坊

仁和倉巷

右三廂

東坊

中沙後巷

西坊

中沙前巷

善履坊

豐樂橋巷

興德坊

鹽橋巷

豐禾坊

豐禾倉巷

昌樂坊

薦橋巷

富樂坊 蒲橋巷

右四廂

甯海坊 鐵碗巷

界分

錢塘縣

南城界

西城界

溫泉界

中路南上分界

中路南下分界

中路北界

外河界

州內界

西湖門南界

西湖門北界

三教門界

吳山北界

西一界

西二界

東一界

東二界

東西一下分界

淨因寺界

三橋南界

三橋北界

壩北界

開道坊界

中棚界

井亭橋北界

橋南界

橋北界

後杭界

木子東界

木子西界

西莊界

仁和縣

中濠南界

眾安東界

小新營界

東營界

妙慈界

沙河東界

壩東界

中濠北界

永新橋界

中濠西界

西營界

仁和界

橋梁

都亭驛橋

州橋

洪橋

阜民橋

過軍橋

通江橋

望仙橋

三聖廟橋

柴塚橋

薦橋

道明橋

豐樂橋

蒲橋

鹽橋

梅家橋

葛公橋

鍾公橋

清泠橋

瓦子前橋

瓦子後橋

金波橋

巧兒橋

亨橋

猫兒橋

舍兒橋

永清橋

水巷橋

炭橋

李博士橋

棚橋

新橋

鵝鳴橋

北橋

軍頭司木橋

清遠橋

仁和倉橋

天水院橋

回龍橋

一名觀橋

貢院橋

祥符橋

眾安橋

淨因寺橋

樓店務橋

石橋

本橋

凌家橋

仁壽橋

轉運衙石橋

渡子橋

六房院橋

金文橋

施家橋

侍郎橋

三橋

將軍橋

施水坊橋

井亭橋

紅橋

鞞鼓橋

馬家橋

洗麩橋

清湖橋

石灰橋

結縛橋

左藏庫橋

丁家橋

紀家橋

車橋

楊四姑橋

新莊橋

師姑橋

斜橋

便橋

物產

禹貢揚州篠蕩既敷厥草惟夭厥木惟喬周官職方氏

揚州其利金錫竹箭其畜宜鳥獸其穀宜稻舊經云產
白編綾緋綾藤紙木瓜橘蜜薑牛膝地黃

今產

穀

秔

粳

粟

麥

麻

豆

衣

綾

絹

布

絲

羅

紬

紗

貨

茶

鹽

絲

蜜

蠟

紙

藥

白朮

茱萸

菖蒲

芍藥

桑白皮

五茄皮	地榆	白芷	地黃	荊芥
鸚粟	薄荷	紫蘇子	麥門冬	天南星
白芨	香附子	牛膝	何首烏	百合
牽牛	地骨皮	牛蒡子	地膚子	乾葛
天花粉	馬兜鈴	丹參	苦參	沙參
石竹	茵陳	白薇	藜蘆	常山
草薺	劉寄奴	葳靈仙	山藥	五倍子
黃菁	草烏頭	菊花	旋復花	枸杞
半夏	鬼箭	山豆根	茯苓	瞿麥
貫眾	牡丹皮	杜仲	車前子	秦皮
石燕子	前胡	寒水石	枳實	續斷

青蒿子 千年潤 香薷 益母子 千金草

地扁蓄 鉤藤 蛇床子 黃皮 苦楝皮

烏藥 獨活 升麻 蒲黃 藁本

百部根 躑躅花 榆白皮 澤蘭 鳳眼草

金星草 覆盆子 木通 白蘚皮

果

橘 橙 梅 桃 李 杏 柿

栗 棗 瓜 梨 蓮 芡菰 藕

菱 枇杷 櫻桃 石榴 木瓜 林檎 楊梅

雞頭 銀杏 甘蔗

花

牡丹	芍藥	酴醾	棣棠	海棠
金林檎	御李	緋桃	滴滴金	碧桃
紅杏	長春	玉簪	水仙	玉梅
薔薇	佛見笑	聚八仙	粉團	山茶
海紅	徘徊	百合	梔子	翦紅羅
石竹	萱草	密友	金鐙	蜀葵
千葉蓮	佛頭蓮	紅榴	木犀	丹桂
木芙蓉	黃菊	山丹	白菊	臘梅
香梅	千葉梅	福梅	瑞香	
木				
桑	梓	柘	松	柏
				桐
				楮

櫟 槐 杉 楮 桂 槿 檀

樟 楓 柳 榆

竹

箬 笙 金 淡 紫 斑

土貢

禹貢揚州厥貢惟金三品厥篚織貝厥包橘柚錫貢唐
書地理志貢白編綾緋綾藤紙木瓜橘蜜薑乾薑芑牛
膝太平寰宇記歲貢乾地黃牛膝藤紙蜜九域志貢綾
三十疋藤紙一千張

兩朝國史貢藏糟瓜薑祥符舊經貢山茶楊梅筍絹納
綿子薑甘蔗

今貢

綾三十疋

稅賦茶租免役和預買附

夏稅每歲 婺州給本府 衣絹二千五百疋 紬三千疋 又

綿二萬七千三百五十兩

絹九萬五千八百一十三疋二尺四寸三分七釐

紬四千四百八十六疋三丈四尺八寸一分二釐

綾五千二百三十四匹一尺

綿五萬八千五百二十一兩二錢二分八釐

秋稅

苗米一十二萬三千七百一十三石六斗八升一合

一勺七撮

茶租錢一萬一千六百八十九貫一百四十三文

免役錢一十二萬一千八百八十五貫七百八十五

文

和預買

每歲認發江陰軍和買細七十
二疋二丈一尺四寸三分五釐

折帛錢九千二百七十八貫五百一十八文

絹四萬三百九十九疋二丈六尺二寸三分五釐

紬七百九十五疋

折帛錢六十四萬八千三百八十五貫五百一十八

文

倉場庫務

錢監作院附

鎮城倉在餘杭門裏

都鹽倉在天宗門裏

常平義倉在餘杭門裏

合同茶場在湧金門裏

糠場在天宗水門裏

城南炭場在候潮門裏

城北炭場在餘杭門外

軍資庫在府衙門之左

常平庫在府衙門之左

公使庫在府衙門之東

甲仗庫在府衙之東

架閣庫在府衙之北

公使酒庫在府衙之西

祇備庫在府衙之西

什物庫在府衙之西

輜擔庫在府衙之西

醋庫一十八處分在府城內外

都稅院在壩頭市東

抵當庫平準務
秤斛局附焉

龍山稅務在嘉會門外

浙江稅務在浙江岸跨浦橋南

北郭稅務在餘杭門外

江漲橋稅務在江漲橋鎮市

紅亭稅務在崇新門外

樓店務在府衙之東

市舶務在保安門外諸家橋之東

酒務五處乾道二年五月二十五日戶部侍郎曾懷申
請併歸戶部贍軍庫取三年所趁息錢以一年酌中之
數爲額卻於贍軍庫取趁息錢內撥還臨安府奉聖旨
依奏

都酒務在清河坊西

南比較務

一名武林園

在壩頭市南

北比較務

一名虎泡泉

在後洋街

龍山酒務在龍山白塔嶺下

江漲橋務在江漲橋鎮市

都作院在湧金門之北小作院附之

錢監大唐寶興鑄錢監在龍山相近吳郡圖經曰每歲官取長洲縣白塍土爲錢塘鑄錢監用今藉田園乃故基也旁有長生水池大中祥符九年五月戊申江淮兩浙發運使李浦言饒池江杭四州錢監每歲共鑄錢一百二十萬貫用銅四百五十三萬斤今廢

館驛亭堂樓觀閣軒附

樟亭驛晏殊輿地志云在錢塘縣舊治之南五里白居易有宿樟亭驛詩羅隱乾符五年夏登是驛看湖有詩廢

郵亭驛在朝天門外中間改名天策今爲昇陽宮

仁和館在清湖闡之南紹興十九年郡守湯鵬舉重建

亭

南園翼亭慶歷三年郡守蔣堂於舊治之東南建翼亭

以對江山之勝崇甯三年蔣之奇作詩紀其事胡宿詩云武林

天下奇翼亭境中絕

介亭在舊治後聖果寺熙甯中郡守祖無擇對排衙石

作介亭左江右湖千里在目無擇爲介亭銘序云亭前

有石二侑自北而南二十舉趾高踰再伋有若衙道故

諺以排衙稱因名其亭曰介亭銘曰猗歟茲亭仁智是

經控帶山海周旋日星嘉乃成績取石於易惟介之義

以敏厥德

東坡居士餞楊次公於此亭詩云丹青明滅風篁嶺環佩空響桃花源郡人謂介亭山下

為桃源路也今廢

清風亭在中和堂之側直望海門廢

曲水亭在舊治治平中郡守舍人沈遘建今廢

望越亭在舊治後慶歷中郡守蔣堂建政和元年郡守

張閣遷翼亭於此遂廢

碧波亭晏殊輿地志云在舊治子城北門外五代史載

錢氏大閱兵於碧波亭亭堦臨水面闊數丈元豐中郡

守張詵重建廢

隆禮亭祥符舊經云在郡城錢塘舊治之南到縣一十

三里廢

敦禮亭祥符舊經云在郡城錢塘舊治之南到縣一十二里廢

崇禮亭祥符舊經云在郡城錢塘舊治之南到縣一十一里廢

鳳凰亭祥符舊經云在通判舊治廢

集賢亭在豐豫門外湖堂前廢

潺湲亭古稱阿閃佛塔亭傍有溝牘引湖水以注相國井而水衝突沸騰遂名潺湲亭廢

通遠亭祥符舊經云在錢塘舊治北到縣四里廢

橘園亭在鹽橋之南乾道五年郡守周淙重脩

馭舟亭在鹽橋之北

安濟亭祥符舊經云在錢塘舊治南到縣二十里

浙江亭祥符舊經云在錢塘舊治南到縣一十五里

堂

有美堂在郡城吳山嘉祐二年龍圖閣直學士梅摯出

守杭州仁宗賜詩寵行摯乃取詩之首章以名有美堂

詩見牧守門歐陽修記曰夫舉天下之至美與其樂有不得

而兼焉者多矣故窮山水登臨之美者必之乎寬閒之

野寂寞之鄉而後得焉覽人物之盛麗誇都邑之雄富

者必據乎四達之衝舟車之會而後足焉蓋彼放心於

物外而此娛意於繁華二者各有適焉然其為樂不得

而兼也今夫所謂羅浮天台衡岳廬阜洞庭之廣三峽

之險號爲東南奇偉秀絕者乃皆在乎下州小邑僻陋
之鄉此幽潛之士窮愁放逐之臣之所樂也若乃四方
之所聚百貨之所交物盛人眾爲一都會而又能兼有
山水之美以資富貴之娛者惟金陵錢塘然二邦皆僭
竊於亂世及聖宋受命海內爲一金陵以後服見誅今
其江山雖在而頽垣廢址荒烟野草過而覽者莫不爲
之躊躇而悽愴獨錢塘自五代時知尊中國効臣順及
其亡也頓首請命不煩干戈今其民幸富足安樂又其
俗習工巧邑屋華麗蓋十餘萬家環以湖山左右映帶
而閩商海賈風帆浪舶出入於江濤浩渺烟雲杳靄之
間可謂盛矣而臨是邦者必皆朝廷公卿大臣若天子

之侍從又有四方游士爲之賓客故喜占形勝治亭榭
相與極遊覽之娛然其於所取有得於此者必有遺於
彼獨所謂有美堂者山水登臨之美人物邑居之繁一
寓目而盡得之蓋錢塘兼有天下之美而斯堂者又盡
得錢塘之美焉宜乎公之甚愛而難忘也梅公清今上御名
好學君子也視其所好可以知其人焉四年八月丁亥
廬陵歐陽修記蔡襄書碑摯又賦五言詩六篇皆以有
美堂新建爲篇首錢氏初建江湖亭於此一時名流皆今
廢

中和堂在舊治又有清風亭在堂之偏望海樓在堂北
建炎三年四月壬戌光堯太上皇帝來登斯堂遠矚稽

山思夏后之功俯瞰濤江懷子胥之烈御製古詩一首
六龍轉淮海萬騎臨吳津王者本無外駕言蘇遠民瞻
彼草木秀感此瘡痍新登堂望稽山懷哉夏禹勤神功
既盛大後世蒙其仁願同越勾踐焦思先吾身艱難務
遵養聖賢有屈伸高風動君子屬意種蠡臣又御書謂
斯堂偉特之觀無愧上都薰風南來我意雖快願與庶
人共之後改爲偉觀堂先是錢氏武肅王建閱禮堂至
和三年郡守孫沔重修棟宇宏麗輪奐一新更名中和
堂趙抃詩云老來重守鳳凰城千里人心豈易平樂
職古賢形嘆頌中和終不爲虛名後人以爲酒名
虛白堂舊圖經云在舊治晏殊輿地志云爲刺史在官
清嚴人無犯者唐長慶中刺史白居易有詩刻石堂上

羅隱虛白堂牡丹詩云莫背欄干便相笑與君俱受主人恩蓋謂白太傅手植此花也郡守梅摯十詩皆以堂有虛白閑爲首章堂前有紫薇兩本世傳居易所植蘇軾有虛白堂紫薇花詩

清暑堂治平三年郡守蔡襄建在州治之左并撰記及書刻石堂上廢

秋香堂在漕憲舊治轉運使劉旣濟建廢

湖堂在豐豫門外堂前有集賢亭廢

三賢堂在孤山竹閣有白樂天林君復蘇子瞻三賢像後廢不存乾道五年郡守周淙重建於水仙王廟之東廡

講易堂在府治之東紹興十六年郡守張澄建張偁名
爲吏隱堂隆興元年陳輝改今名中書舍人張孝祥書
左朝請大夫葛立方撰記

樓

東樓

一名望海樓

在舊治中和堂之北太平寰宇記云高十

八丈唐武德七年置廢

十三間樓去錢塘門二里許蘇軾治杭日多治事於此
廢

豐豫門湧金樓政和六年郡守徐鑄以豐豫門樓隳損
命鈐轄楊靖重建頗極壯麗榜曰湧金樓

聳翠樓在豐豫門外政和七年郡守徐鑄命鈐轄楊靖

於湖堂之右以眾樂亭舊趾臨湖為聳翠樓

今豐樂樓

望湖樓

一名看經樓

乾德五年忠懿王錢氏建去錢塘門一

里蘇軾有望湖樓詩

觀

雲濤觀在舊治政和元年郡守張閣既徙巽亭以其舊

址更造廢

閣

儒賢亭會之閣故相劉正夫之居在萬松嶺東青平門

青平乃公舊里號青平里時人因以此名之

政和三年勅建御書閣賜是名

廢

一德格天之閣紹興中御書賜太師秦檜之居廢

望海閣在漕臺舊治廢

白公竹閣在孤山與柏堂相連有唐刺史白居易祠蘇軾有竹閣柏堂二詩

巢居閣林逋故廬有此閣或云在寶雲寺卽雲巢也
紅梅閣在府治

軒

石林軒在舊治後至和中郡守孫沔初建號燕思閣又取臨安縣淨土寺立石七株置之閣前蒼然奇怪號七賢石元祐中郡守蒲宗孟改名石林軒廢

乾道臨安志卷二

乾道臨安志卷第三

牧守 政績附

歷代

全琮

黃武五年吳孫權分三郡險地爲東安郡全琮領郡
太守治富春明賞罰招誘降附數月中得萬餘人召
還琮字子璜錢唐人見吳志

柳冲

唐貞觀中爲杭州刺史有能名蒲州虞鄉人

袁仁敬

開元十三年明皇自擇刺史凡十一人大理少卿袁

仁敬爲杭州刺史治行諸宰相諸王御史以上祖道
洛濱盛具奏太常樂帛舫水嬉命高力士賜詩帝親
書且給筆札令自賦

崔渙

肅宗時爲左散騎常侍餘杭太守江東採訪使博陵
安平人

房孺復

唐貞元初韋應物爲蘇州牧房孺復爲杭州牧韋嗜
詩孺復嗜酒每與賓友一醉一詠其風流雅韻多播
於吳中或曰韋房爲詩酒仙見白居易吳郡詩石記
元和姓纂云孺復河南人

李泌

字長源代宗朝爲杭州刺史引湖水入城爲六井以利民爲政有風績德宗在奉天召赴行在授左散騎常侍拜中書侍郎同中書門下平章事封鄴縣侯

白居易

字樂天事唐穆宗爲中書舍人長慶二年七月出爲杭州刺史始築堤捍錢塘湖鍾洩其水溉田千頃復濬李泌六井民賴其汲久之以太子左庶子分司東都封馮翊縣侯

李宗閔

字損之文宗時爲杭州刺史

宣祖廟諱
下一字亮

為給事中杭州刺史

裴夷直

字禮卿武宗時自中書舍人出為杭州刺史

李中敏

字藏之隴西人唐文宗開成末為杭州刺史

李錡

唐淄川王五世孫自雅王傳出為杭州刺史居三歲
遷浙西觀察諸道鹽鐵轉運使

于郃

字相門京兆萬年人以右諫議大夫知制誥拜杭州

刺史

楊憑

字虛受治京兆有政績後徙杭州刺史

崔彥會

懿宗朝咸通二年爲杭州刺史

地理志

右並見唐書

韋夔

虞部郎中杭州刺史京兆杜陵人

崔恂

水部郎中杭州刺史鄭州人

裴常棣

臣等三
三
兵部郎中杭州刺史河東聞喜人白居易冷泉亭記
日觀風亭常棣所建

獨孤嶼

侍御史杭州刺史洛陽人

李自挹

杭州刺史

唐宗室

封亮

司封員外郎杭州刺史渤海人

雙士恪

右武衛大將軍定相二州總管杭州刺史呂國公天

水郡人

薛自勉

司勳員外郎餘杭太守河東汾陰人

薛瑩

杭州刺史河東汾陰人

盧涇

杭州刺史范陽涿縣人

楊行矩

蔡州總管杭州刺史上蔡人

柳楚賢

光祿少卿杭州刺史河東解縣人

柳德義

杭州刺史河東人

史令卿

祠部郎中杭州刺史建康人

杜信

刑部員外郎杭州刺史京兆人

右見元和姓纂

相里尹造

韓僕射臯

給事中盧元輔

右司郎中河南元夔

右四人及裴常棣見白居易冷泉亭記

王顏

貞元六年爲杭州刺史見國一禪師塔銘

杜陟

陸則

李幼

崔鄩

路異

右五人並杭州刺史與白居易盧元輔裴常棣楊憑九人皆曾造僧慧琳之室論心要見慧琳碑

周寶

爲杭州刺史後唐僖宗時羣盜起寶募諸縣鄉兵討

之號八都兵見五代史

國朝

范旻

太平興國三年三月己酉吳越國王錢俶朝于乾德
殿是年俶乃納土五月丙戌太宗皇帝始命水部郎
中范旻爲考功郎中知杭州左贊善大夫孟貽孫通
判事自是名卿鉅公接武而至舊常記姓名於廳事
燦然可觀也至建炎間兵戈擾攘城邑隳廢牧守姓
氏隨亦湮沒於是博考載籍咨詢耆舊質諸太史氏
自太平興國戊寅歲訖紹興辛亥凡一百五十三年
僅得范旻而下一百人

再除者一十三
人三除者一

官稱名字除

授歲月及史官所紀善政美績編列於左疑者闕焉
自紹興辛亥以後則有太學博士何浦所撰題名記

云浦一作溥

李繼凝

太宗卽位轉刑部員外郎充兩浙轉運使尋知杭州
召還闕改刑部郎中充樞密直學士

劉知信

端拱二年四月丁卯以邕州觀察使劉知信知杭州

王化基

淳化四年五月庚戌以工部侍郎王化基知杭州遷
禮部召還以本官參知政事本傳字永圖真定府人

嘗作東南行百韻好事者傳誦之

魏羽

字垂夫歙州婺源人拜給事中知潭州徙知杭州真宗卽位遷工部侍郎召還

張去華

至道三年六月丙午以給事中新知益州張去華知杭州咸平二年四月戊寅徙知蘇州

張詠

咸平二年四月戊寅以御史中丞張詠爲工部侍郎知杭州本傳詠以剛方自任以嚴猛爲治御下甚峻性躁急果決郡事都出於獨斷屬歲歉民多鬻私鹽

以自給犯者甚眾連捕數百人詠悉寬其罰而遣之
官屬請曰不痛繩之恐無以禁詠曰錢塘十萬民飢
者八九苟不以鹽自活一旦蜂聚數千輩爲寇盜則
其患甚矣當俟秋成乃仍舊法是歲民獲安濟又有
民家子與姊壻訟家財壻言妻父臨終此子三歲故
見命掌貲產且有遺書令異日以十之三付子餘七
分與壻詠覽之以酒酌地曰汝妻父智人也以子幼
甚故託汝倘遽以家財十之七與子則子死於汝手
矣亟命以十之七給其子餘三分給壻皆服其明斷
拜泣而去咸平四年九月辛卯杭州民詣闕獻土星
圖一銀百兩乞留知州詔獎詠仍還其銀代還知永

興軍府拜尙書右丞字復之濮州鄆城人

自號乖崖公

宋太初

咸平五年五月癸丑以右諫議大夫宋太初知杭州
是年十一月甲午徙知廬州太初字永初澤州晉城
人

王仲華

咸平五年十一月甲午以太常少卿知蘇州王仲華
爲右諫議大夫知杭州六年十月戊午徙知處州

薛暎

咸平六年六月丁亥以禮部郎中知制誥權判度支

薛暎爲諫議大夫知杭州

本傳景德初知杭州而咸平六年十月前守王仲華

方徙處州豈次字景陽臨決蠶銳州無留事是時起
年映方到官耶
居舍人直史館姚鉉爲轉運使檄屬郡當直司毋得
輒斷徒以上罪映卽奏徒流笞杖自有科條苟情狀
明白何須繫獄以累和氣請詔天下凡徒流罪人於
長史前對辯如無所異聽遣決之朝廷施用其言在
杭五年其治嚴明吏不能欺每五鼓冠帶黎明據案
決事雖寒暑無一日異入知通進銀臺司兼門下封
駁事

王濟

景德四年九月辛巳以工部員外郎兼侍御史知雜
事王濟爲工部郎中知杭州本傳字巨川性剛直無

所畏避出知杭州真宗面加慰諭大中祥符四年遷
刑部郡城西有錢塘湖可溉田千餘頃歲久湮塞命
工濬治增置斗門以備潰溢之患仍以白居易舊記
刻石湖側民頗利之徙居洪州

戚綸

大中祥符三年九月壬午以樞密直學士戶部郎中
戚綸知杭川就加左司郎中五年正月甲戌綸與轉
運使陳堯佐言浙江壞岸漸逼州城望遣使自京師
部埽匠壕寨赴州工役詔從之令馳驛而往命轉運
使更互檢校遂以埽岸易柱石之制雖免水患而眾
頗非其變法七年三月癸卯徙知揚州綸本傳字仲

言應天府楚邱人

薛顏

大中祥符七年三月癸卯以司封郎中薛顏爲太僕少卿知杭州八年七月丁卯以新修冊府元龜分送洪杭二州

馬亮

大中祥符九年九月己酉徙工部侍郎知昇州馬亮知杭州丁卯詔如聞杭州葺江岸卒執役水中苦足疾而死者甚眾宜令知州馬亮拯療之十月己卯加集賢院學士亮本傳字叔明有治劇才先是江濤大溢調兵築隄而工未就詔問亮所以扞江之策亮至

禱於伍員祠下明日潮爲之卻又出橫沙數里隄遂
以成又上言近歲以來父祖未葬而多別財異爨甚
傷風教請自今未葬者不得析居明年改工部侍郎

知廬州

眞宗朝致仕諡忠肅

王欽若

天禧三年六月甲午尙書左僕射兼中書門下平章
事王欽若除太子太保判杭州又詔曰鈞衡翊贊素
彰勤盡之心藩翰鎮臨方伉惠和之績眷言寄任用
示獎稱眞宗御製七言十韻詩一首賜之早自外朝
登近侍克符昌運振嘉名一參黃閣推良畫再陟鴻
樞顯至榮該博古今常納獻勤勞夙夜每專精石渠

撰述多文備日觀封崇大禮成宰輔調元心匪懈眞
官兼職望彌清龍樓進秩恩尤異熊軾爲藩任不輕
二浙奧區期惠化三吳佳致悅高情重重山水舟中
見處處壺漿陌上迎旣肅邇遐安外域更分宵旰撫
黎氓予衷側席方毗倚仁看甘棠播頌聲仍命依韻
和進舊刻石於天慶觀天禧四年八月甲申召知相州

王隨

天禧四年九月己酉朔以右諫議大夫兼太子右庶
子權知開封府王隨爲給事中知杭州乾興元年二
月戊辰授秘書少監知通州

李及

乾興元年三月壬申以樞密直學士給事中李及知
杭州天聖元年九月丁亥徙知應天府兼南京留守
司本傳字知幾資性清介所治尙簡嚴喜慰薦下吏
而樂道人之善在杭州惡其風俗輕靡未嘗事燕遊
一日微雪遽出郊眾謂當命賓朋爲高會乃獨造處
士林逋清談至暮而歸任中不市物及去惟買白樂

天集一部

天聖六年卒謚恭惠

周起

天聖元年九月丁亥徙知揚州秘書監周起知杭州

馬亮

再除

天聖四年三月庚辰徙知亳州工部尙書集賢院學

士馬亮知杭州未行復知亳州是年四月戊午徙周起知應天府兼南京留守司

胡則

天聖四年戊午徙太常少卿知福州胡則爲諫議大夫知杭州

李諮

天聖六年正月戊午以右諫議大夫知洪州李諮爲給事中知杭州七年十月丙戌徙知永興軍

朱巽

天聖七年以左諫議大夫給事中新知河中府朱巽知杭州八年四月甲申爲集賢院學士五月乙丑徙

知揚州本傳字順之揚州天長人忠愿自守真宗稱
爲長者

陳從易

天聖八年五月癸丑以左諫議大夫知制誥陳從易
爲龍圖閣直學士知杭州從易本傳字簡夫泉州人
九年正月卒於官

張觀

天聖九年二月己丑以右司諫知制誥張觀爲尙書
兵部員外郎知杭州觀本傳字思正絳州人真宗朝
以服勤辭學科擢爲第一初名正觀至是御筆去上
一字知杭州再遷刑部郎中代還判國子監

累除同知樞密

院事拜尙
書左丞

胡則再除

明道二年四月甲子徙知陳州尙書刑部侍郎胡則
知杭州景祐元年四月甲辰除兵部侍郎致仕則本
傳字子正婺州永康人少有清名尙風義真宗仁宗
擢用焉

鄭向

景祐元年四月丙午以尙書兵部郎中知制誥鄭向
爲龍圖閣直學士知杭州三年四月庚午杭州言向
卒本傳字公明開封陳留人

俞獻卿

景祐三年四月辛未以右諫議大夫俞獻卿爲集賢院學士知杭州四年十二月庚午爲給事中本傳字諫臣歙州人眞宗朝嘗爲杭州仁和令暨知杭州一日暴風江湖溢決堤勢不可禦獻卿鑿西山石作堤數十里民用便之賜詔褒諭

柳植

寶元元年六月癸未徙知蘇州尙書工部侍郎知制誥柳植知杭州二年八月辛未以植爲翰林學士

司馬池

寶元二年八月丁丑徙知同州尙書工部郎中天章閣待制司馬池爲兵部郎中知杭州康定元年九月

辛酉移知虢州

張若谷

康定元年九月辛酉以知應天府樞密直學士尙書
刑部侍郎張若谷爲龍圖閣直學士知杭州慶歷元
年五月壬申徙知鄭州

鄭戩

慶歷元年五月辛未以樞密副使右諫議大夫鄭戩
爲資政殿學士知杭州二年六月癸未除給事中知
并州戩本傳字天休蘇州人性強毅明俊意有所欲
必行之西湖漑民田數百頃歲久不治葑泥湮塞久
爲豪族與僧寺規占甚多戩乃發屬縣丁數萬盡闢

之民賴其利後有詔歲常修導

蔣堂

再除

慶歷二年六月甲午以尙書戶部郎中天章閣待制
知應天府蔣堂爲左司郎中知杭州三年六月丁巳
除樞密直學士知益州堂本傳字希魯宜興人始知
杭州徙益州移河中府再知杭州

宋祁

慶歷三年七月丁卯以尙書禮部郎中知制誥宋祁
爲龍圖閣直學士知杭州本傳云未行改翰林學士
知審刑院

楊偕

慶曆三年九月壬辰以知越州翰林侍讀學士尙書左司郎中楊偕知杭州偕本傳字次公性剛樸敢爲大言慶曆三年知審官院求知越州道改杭州上太平可致十象圖還判太常寺

方偕

慶曆五年十月戊寅徙淮南江浙荆湖制置發運使尙書兵部員外郎天章閣待制方偕知杭州六年六月甲戌轉刑部郎中七年七月庚子除太常少卿分司西京本傳字齊古莆田人本以吏事進而杭訟牒素煩遣決無留事以病故分司

范仲淹

皇祐元年正月乙卯以知鄧州資政殿學士給事中
禮部侍郎范仲淹知杭州七月癸卯加尙書禮部侍
郎二年十月戊辰加戶部侍郎十一月辛酉徙京東
東路安撫使知青州本傳字希文自樞密副使除參
知政事以疾請知鄧州徙杭州內剛外和所至有恩
里巷之人皆知其名字

諡文正

張方平

皇祐二年十一月辛酉以知江甯府端明殿學士兼
龍圖閣學士給事中張方平知杭州本傳字安道宋
城人慷慨有節氣知杭州言畿內稅賦之重及請減
定刺配刑名由是畿縣稅損元額十三刺配法亦稍

裁之遷禮部侍郎知滑州

累遷參知政事謚文定

呂溱

皇祐三年六月甲午以起居舍人呂溱知杭州本傳
字濟叔揚州人舉進士第一累遷知制誥知杭州爲
人簡倨接賓客不過數言時人目爲七字舍人然開
敏善議論一時名公多推許之自杭州除糾察在京
刑獄勾當三班院

孫沔

皇祐五年四月壬子以樞密直學士給事中孫沔知
杭州行至南京召爲樞密副使本傳字元規會稽人
明敏果敢有吏材所在皆著能迹其知杭州仁宗解

御帶賜之

李兌

皇祐五年八月己未以尙書吏部員外郎天章閣待制知諫院李兌爲戶部郎中知杭州本傳字子西許州人知杭州日仁宗飛白書安民字以賜之介靜簡嚴年老而精明有所舉措要使民便安之

孫沔再除

至和元年二月壬戌以樞密副使給事中孫沔爲資政殿學士知杭州嘉祐元年八月戊午加資政殿大學士京東東路安撫使知青州

何中立

嘉祐元年八月壬戌徙知陳州樞密直學士尙書刑部郎中何中立知杭州二年八月癸酉杭州言中立卒本傳字公南許州人頗工文詞

梅摯

嘉祐二年九月戊寅以龍圖閣直學士尙書吏部郎中梅摯知杭州三年六月丙辰徙知江甯府本傳云字公儀成都府人性澹靜不爲矯厲之行所治如其爲人雅好詩時有警句其知杭州仁宗賜詩寵行地有湖山美東南第一州剖符宣政化持橐輟才流暫出論思列遙分盱仄憂循良勤撫俗來暮聽歡謳摯以詩之首章名堂爲有美命歐陽修撰記刻石堂上

唐詢 鄉郡

嘉祐三年六月丙辰以知蘇州尙書禮部郎中知制

誥唐詢知杭州五年九月甲辰除禮部郎中本傳字

彥猷杭州錢塘人

餘具人物門

施昌言

嘉祐五年九月甲辰以知鄧州樞密直學士給事中

施昌言爲尙書刑部侍郎知杭州七年八月甲申除

龍圖閣直學士涇原路經略安撫使本傳字正臣通

州靜海人

沈遘 鄉郡

嘉祐七年八月甲申以起居舍人知制誥沈遘爲尙

書禮部郎中知杭州本傳字文通杭州人自越州徙
知杭州遷吏部郎中召爲勾當三班院爲人輕儁明
敏通達世務其治杭令行禁止人有貧不能葬及女
子孤無以嫁者以公使錢葬嫁數百人倡優養良家
女爲己子者奪歸其父母接遇士大夫多得其歡心
所部吏尤樂傾盡爲之耳目刺閭巷間事纖悉卽知
故事至立斷眾莫不駭伏小民有犯情稍不善不問
法輕重斷訖強刺爲卒刺者數百人屏息不敢犯
議者以其嚴比孫沔然沔苛暴銳於懲惡至遊善人
亦懼焉晨起治事及午事畢出與賓舊往還從容談
笑以示有餘士大夫稱其能

王琪

治平元年九月甲戌以樞密直學士同判太常寺王琪知杭州十一月己亥轉右諫議大夫二年徙知揚州本傳字君玉成都人以詩知名於世

蔡襄

治平二年二月以三司使給事中蔡襄爲端明殿學士尙書禮部侍郎知杭州本傳字君謨興化軍仙游人爲政精明吏不能欺三年五月甲寅徙知應天府

胡宿

治平三年四月庚戌以樞密副使尙書禮部侍郎胡宿爲尙書吏部侍郎觀文殿學士知杭州四年六月

甲子以太子少師致仕本傳字武平常州晉陵人清
儉謹默內剛外和其蒞官治事今上御名重不輒發發亦

不可回臨民篤恭不略細故人尤愛之神宗卽位遷

左丞以疾卒於杭州學問文章人多稱述之諡曰文恭

呂溱再除

治平四年六月甲戌以給事中集賢院學士呂溱爲

龍圖閣直學士再知杭州九月辛丑除知開封府

祖無擇

治平四年十月丁未以右司郎中知鄭州祖無擇爲

右諫議大夫加龍圖閣學士知杭州

鄭獬

熙甯二年五月癸未以翰林學士尙書兵部員外郎
鄭獬爲翰林侍讀學士戶部郎中知杭州三年四月
己卯徙知青州本傳字毅夫安州人舉進士第一

趙抃

熙甯三年四月己卯以右諫議大夫參知政事趙抃
爲資政殿學士知杭州十二月庚申徙知青州本傳
字閱道衢州西安人和易長厚氣貌清逸所至必興
學校勸獎後進爲政視其俗之厚薄與事多寡設施
爲術不同杭州故多盜聞抃性寬細民益聚爲盜抃
取其情重者配他州盜遂散去境內以清

沈立

熙甯三年十二月庚申以知越州右諫議大夫沈立
知杭州本傳字立之和州人知越州移杭州除審官
西院勤於職事所得圭租多以市書

陳襄

熙甯五年五月乙未以知陳州尙書刑部郎中知制
誥陳襄知杭州熙甯七年六月己巳徙知應天府本
傳字述古福州人有學行所至務先學校至親爲講
解好荐達人才喜愠不形於色爲政多慕古人所爲

楊繪

熙甯七年六月己巳以知應天府翰林侍讀學士尙
書禮部侍郎楊繪知杭州

與陳襄兩
易其任

本傳字元素漢

州人爲翰林學士御史中丞出知應天府徙杭州再入爲翰林學士兼侍讀

沈起

熙甯七年九月丙申徙知潭州尙書刑部郎中天章閣待制沈起知杭州本傳字興宗明州人爲人寬和臨事明敏

蘇頌

熙甯九年正月丙寅以秘書監集賢院學士蘇頌知杭州本傳字子容時以吳越薦飢自勾當三班院選知杭州召爲提舉中太一宮修仁宗英宗正史

章惇

熙甯十年五月庚申以知湖州右正言知制誥章惇
知杭州未行爲翰林學士

趙抃

再除

熙甯十年五月癸亥以知越州資政殿大學士右諫
議大夫趙抃知杭州十月戊子抃言吳越國王錢氏
有墳廟在錢塘臨安縣棟宇頽圯林木荒穢欲令兩
縣選僧道主管歲度其徒各一人從之朝旨欲修杭
州城抃度出於人者數千萬獨奏杭人新罹旱災未
可興工乃罷役抃告老元豐二年以舊職加太子太

保致仕

白號知非
子諡清獻

鄧潤甫

元豐二年正月己丑以右諫議大夫知撫州鄧潤甫
知杭州四年四月乙酉除龍圖閣直學士徙知成都
府本傳字聖求建昌人

累遷尙書左丞諡安惠

張詵

元豐二年四月乙酉以龍圖閣直學士知成都府張
詵知杭州本傳字樞言浦城人既除知杭州未行詔
權知熙州經略熙河事既而赴杭州哲宗卽位遷正
議大夫請解郡事除提舉杭州洞霄宮

呂公孺

元豐八年四月丁丑以正議大夫呂公孺知杭州未
行五月丙辰除龍圖閣直學士知鄆州本傳字稚卿

故相夷簡之子初知陳州徙杭州再知鄆州

蒲宗孟

元豐八年七月庚戌以新知揚州太中大夫資政殿

學士蒲宗孟知杭州元祐二年十一月己酉徙知鄆

州本傳字傳正閩州人

集錢塘詩自宋齊以來至元豐間凡三千餘篇為三十卷

行於世

楊繪再除

元祐二年十一月庚申以知徐州朝散大夫天章閣

待制楊繪知杭州本傳神宗朝知杭州入為翰林學

士兼侍讀英宗即位再知杭州元祐三年六月杭州

言繪卒繪吏事敏給主於愛利雖胥吏阜隸有過多

容之

熊本

元祐三年六月癸巳以龍圖閣待制知越州熊本知
杭州四年五月庚午徙知江甯府

蘇軾

元祐四年三月丁亥以翰林學士蘇軾爲龍圖閣學
士知杭州六年正月丙戌除吏部尙書本傳字子瞻
眉州人熙甯四年通判杭州後十六年復爲郡守歲
適水潦飢疫相仍軾爲請於朝得減上供米三之一
故穀不翔躡復以所賜度牒益市粟濟飢殍明年賤
糶常平米又作糜粥遣人命醫官分治疾病賴以全

活者甚眾開西湖疏茆山鹽橋河修治堰閘濬城中
六井與民興利除害講究甚悉郡人德之爲立祠堂
六年召爲翰林學士承旨

熊本
再除

元祐六年正月丙戌以龍圖閣待制知江甯府熊本
知杭州本傳字伯通鄱陽人初除越州道移杭州徙
江甯府遷中大夫復除杭州未行召還

林希

元祐六年二月癸巳以朝奉大夫天章閣待制知潤
州林希知杭州是年三月癸酉詔遷一官七年十月

丁丑除禮部侍郎

累遷同知
樞密院事

王存

元祐七年八月癸亥以吏部尙書知大名府王存知
杭州紹聖元年八月丁丑提舉江甯府崇禧觀

陳軒

紹聖元年八月乙酉以知廬州龍圖閣待制陳軒知
杭州三年八月辛巳徙知江甯府本傳字元興建州
建陽人嘉祐八年舉進士第二

韓宗道

紹聖三年八月辛巳以知瀛州大中大夫寶文閣待
制韓宗道知杭州元符元年七月丁卯除工部侍郎
本傳字持正眞定人後以疾請詔以舊職加通議大

夫致仕命未下四年卒

李琮

紹聖四年七月戊辰以刑部侍郎李琮爲寶文閣待制知杭州元符元年八月丙子徙知永興軍

虞策

鄉郡

元符元年八月丙子以龍圖閣待制新知永興軍虞

策知杭州未行九月己酉除戶部侍郎

林希

再除

元符元年九月己酉以中大夫知亳州林希知杭州

豐稷

元符二年 月 以龍圖閣待制豐稷知杭州三

年四月己酉除諫議大夫

呂惠卿

元符三年四月己酉以檢校司徒鎮南軍節度使知
延安府呂惠卿知杭州建中靖國元年三月癸亥爲
觀文殿學士右銀青光祿大夫提舉杭州洞霄宮

龔原

建中靖國元年三月癸亥以承議郎知壽州龔原爲
寶文閣待制知杭州是月戊子爲集賢院修撰知揚
州

陳軒再除

建中靖國元年三月戊子以龍圖閣直學士新知揚

州陳軒知杭州崇甯元年四月癸卯徙知福州

鄒浩

崇甯元年四月癸卯以寶文閣待制知江甯府鄒浩
知杭州五月己卯移知越州

呂惠卿

再除

崇甯元年閏六月己未以右銀青光祿大夫提舉杭
州洞霄宮呂惠卿爲觀文殿學士知杭州八月移知
揚州

蔣之奇

崇甯元年十月癸亥以知樞密院事蔣之奇爲觀文
殿學士知杭州

字文昌齡

崇甯二年九月乙巳以寶文閣待制知越州字文昌齡知杭州四月以中大夫致仕

王甯

崇甯四年六月戊子以尙書吏部侍郎王甯爲顯謨閣待制知杭州七月丙申改知海州

曾孝廣

崇甯四年七月丁巳以戶部尙書曾孝廣爲天章閣待制知杭州十一月丙午徙知泰州

呂惠卿 三除

崇甯五年八月癸酉以觀文殿學士知青州呂惠卿

知杭州

曾孝蘊

大觀元年四月辛未以顯謨閣待制淮南江浙荆湖等路發運使曾孝蘊知杭州既而改知濠州

朱彥

大觀元年五月戊申以顯謨閣待制新知洪州朱彥知杭州四年正月庚申徙知潁昌府

王渙之

大觀二年三月辛酉以顯謨閣待制知潭州王渙之知杭州

席震

大觀三年二月壬午以徽猷閣待制知潭州席震知
杭州是年五月丁卯改知廣州壬申復知杭州

蔡薺

大觀三年七月丁未以奉議郎知和州蔡薺爲顯謨
閣待制知杭州十月甲戌除給事中

張商英

大觀三年十二月癸酉以通議大夫提舉成都府玉
局觀張商英爲龍圖閣直學士知杭州乘驛赴闕四
年二月辛未除資政殿學士中太一宮使

劉逵

大觀四年二月壬辰以中大夫提舉亳州明道宮劉

達知杭州本傳字公達隨州隨縣人元豐八年舉進士第三四年六月庚午除資政殿學士癸未詔乘驛赴闕

張閣

大觀四年九月壬申以翰林學士張閣爲龍圖閣學士知杭州本傳字臺卿河陽人杭久闕守郡事廢弛閣經理有敘首去惡少之爲民害者郡人爲立生祠召爲兵部侍郎

龐寅孫

政和元年九月辛酉以司農卿龐寅孫爲顯謨閣待制知杭州三年六月丙子除徽猷閣直學士

董正封

政和四年八月甲子以中大夫集賢殿修撰董正封
爲徽猷閣待制知杭州

李偃

政和五年八月甲辰以起復集賢院修撰李偃爲徽
猷閣待制知杭州十二月癸亥徙爲河南尹偃嘗奏
湯村岩門白石等處並邊錢塘江通大海日受兩潮
漸致侵嚙乞依六和寺岸用石砌疊詔令轉運使劉
旣濟措置

趙曠

政和六年閏九月戊辰以中奉大夫右文殿修撰京

畿轉運使趙曠爲徽猷閣待制知杭州宣和元年八月丙戌移知潭州

趙雯

宣和元年八月丙戌以徽猷閣待制江淮荆浙等路發運使趙雯知杭州二年十二月丁亥徙知青州

曾孝蘊

再除

宣和二年十二月丁亥以朝請大夫天章閣待制新知睦州曾孝蘊知杭州

虞奕

鄉郡

宣和三年正月辛酉以起復龍圖閣直學士新知杭州虞奕知鎮江府是年四月丁酉以知杭州曾孝蘊

爲顯謨閣直學士

蔡薺
再除

宣和三年十月丁未以通議大夫提舉嵩山崇福宮
蔡薺知杭州四年十一月癸巳詔龍圖閣直學士知
杭州蔡薺提舉南京鴻慶宮

翁彥國

宣和四年十二月甲午以朝散大夫徽猷閣直學士
知江甯府翁彥國知杭州七年十一月辛巳除提舉
南京鴻慶宮

唐恪

宣和七年十一月辛巳以延康殿學士正議大夫知

潭州唐恪知杭州靖康元年正月己巳除吏部尙書
翁彥國

靖康元年正月己巳以朝散大夫徽猷閣直學士翁
彥國知杭州是月乙未改知鎮江府

毛友

靖康元年正月甲辰以朝散大夫延康殿學士毛友
知杭州是年十月乙巳除宮祠

葉夢得

靖康元年十月乙卯以朝散大夫葉夢得復龍圖閣
待制知杭州

錢伯言

建炎元年八月丁丑以龍圖閣直學士錢伯言知杭州

待其傅

建炎元年九月丁未以朝議大夫直秘閣知真州侍其傅特授集英殿修撰知杭州二年四月十四日徙

知宣州

康允之

建炎二年七月庚戌以徽猷閣待制康允之知杭州

三年八月罷通判軍事安自強權州事是年十一月三日改杭州

為臨安府

季陵

建炎四年四月以閣待制季陵知臨安府

胡舜陟

建炎四年六月戊寅以徽猷閣待制胡舜陟知臨安府是年八月丁憂解官

李光

建炎四年九月甲寅以徽猷閣待制李光知臨安府

紹興元年正月三日徙知洪州

孫覲

紹興元年三月三日朝奉郎提舉江州太平觀孫覲除龍圖閣待制知臨安府

紹興題名記

安撫敷文湯公帥臨安之明年暇日謂其屬吏何溥
曰臨安爲東南一都會登郡而府有年於茲異時名
公鉅儒旌棨相望流風美政播在人口至今故老能
言之矧惟皇帝時巡警蹕所在呼吸四方根柢萬寓
其事勢增重實視古京兆自始幸距今凡二十年帥
臣代易僅以十數至問其姓名輒不可盡得閒訪而
得之往往不能以次對豈非題名不立之故哉予將
編列其人勒之堅石以植於府治之東偏庶幾來者
有攷焉子其爲我記之溥旣承命退而考求其故維
臨安舊爲杭州領浙西兵馬鈐轄宣和間改安撫使
至建炎而陞爲府未幾鈐轄如舊自紹興駐蹕以來

事任非曩比故使名復立至今凡爲帥十有六人於是爲記紹興十九年六月二十七日府學教授兼權太學博士何溥記

席益

紹興元年十一月二十六日朝奉郎起居舍人席益除集英殿修撰知臨安府二年正月十八日徙知衢州

宋輝

紹興二年正月十六日朝議大夫直龍圖閣發運副使宋輝除秘閣修撰知臨安府三年二月二十五日除宮祠

盧知原

紹興三年三月初五日以右中奉大夫徽猷閣待制
都督府參謀官盧知原知臨安府是年六月二十七
日除宮祠

梁汝嘉

紹興三年七月初三日右朝請郎直秘閣兩浙轉運
副使梁汝嘉除龍圖閣知臨安府六年八月初五日
除戶部侍郎

李謨

紹興六年八月二十九日以左中奉大夫直寶文閣
知鎮江府李謨知臨安府七年正月初八日復知鎮

江府

呂頤浩

紹興七年二月二十七日鎮南軍節度使知潭州呂頤浩除少保知臨安府八年正月初八日召赴行在

張澄

紹興八年二月二十九日以右朝請大夫集英殿修撰知建康府張澄知臨安府十年六月初一日除戶部侍郎

蔣燦

紹興十年六月初一日以右中奉大夫直龍圖閣兩浙轉運副使蔣燦知臨安府是年八月二十二日復

爲兩浙轉運副使

張滙

紹興十年八月二十四日以右朝散大夫直秘閣兩浙轉運副使張滙知臨安府是年九月二十一日復爲兩浙轉運副使

俞俟

紹興十年九月二十六日右朝請大夫直秘閣知揚州俞俟除秘閣修撰知臨安府十二年十一月初四日除敷文閣直學士提舉江州太平觀

王喚

紹興十二年十一月初四日右中大夫集英殿修撰

兩浙轉運副使王喚除敷文閣待制知臨安府十三年八月初八日除工部侍郎

張叔獻

紹興十三年八月初八日以右朝奉郎直龍圖閣兩浙轉運副使張叔獻知臨安府十四年十一月初三日改知紹興府

張澄

再除

紹興十四年十一月初三日以龍圖閣學士右宣奉大夫知紹興府張澄知臨安府十六年九月十八日除慶遠軍節度使改知温州

沈該

紹興十六年十月初五日以左朝散大夫直秘閣兩浙轉運判官沈該知臨安府十七年八月十四日除權禮部侍郎

趙不奔

紹興十七年八月十四日右中奉大夫權工部侍郎趙不奔除敷文閣待制知臨安府十八年六月十九日除工部侍郎

湯鵬舉

紹興十八年六月十九日左中奉大夫直秘閣兩浙轉運判官湯鵬舉除直敷文閣知臨安府十九年八月十七日除司農卿

宋貺

紹興十九年八月二十三日以右通奉大夫權尙書
戶部侍郎宋貺兼權知臨安府二十一年閏四月十
二日轉正奉大夫罷

趙士彰

紹興二十一年閏四月十三日以左朝請大夫兩浙
轉運判官趙士彰兼權知臨安府是年九月十三日
除直秘閣十九日正除知府二十三年九月二十三
日除直敷文閣改知紹興府

曹泳

紹興二十三年九月二十三日右朝請大夫直徽猷

閣知紹興府曹泳除直顯謨閣知臨安府十月初三日
到任二十四年十一月十七日兼權戶部侍郎二
十五年十月二十三日罷

韓仲通

紹興二十五年十月二十四日以右通奉大夫權刑
部尙書兼權詳定一司勅令韓仲通兼權知臨安府
二十六年三月十七日除戶部尙書依舊兼府事

榮蕤

紹興二十六年九月八日右朝請大夫知常州榮蕤
除直秘閣知臨安府二十七年二月十一日以職事
修舉轉右朝議大夫繼以磨勘轉右中奉大夫七月

十一日除權戶部侍郎

張偁

紹興二十七年七月十一日以右朝議大夫直秘閣
兩浙轉運判官張偁知臨安府是年十二月除直敷
文閣二十八年九月轉右中奉大夫十一月除直顯
謨閣二十九年閏六月初九日除秘閣修撰知明州

趙子瀟

紹興二十九年閏六月初九日左朝請大夫直秘閣
權發遣兩浙路計度轉運副使趙子瀟除直敷文閣
權發遣臨安府三十年二月十五日除戶部侍郎

錢端禮

紹興三十年二月十五日右中大夫充秘閣修撰兩浙路計度轉運副使錢端禮除右文殿修撰知臨安府是年七月十一日除戶部侍郎

黃仁榮

紹興三十年七月十一日右中奉大夫直秘閣兩浙路計度轉運副使黃仁榮除直敷文閣知臨安府是年九月初三日丁母憂

錢端禮

紹興三十年九月初四日以右中奉大夫權尙書戶部侍郎錢端禮兼權知臨安府三十一年正月十九日罷

趙子瀟再除

紹興三十一年正月十九日左朝議大夫權尙書戶部侍郎趙子瀟除敷文閣待制知臨安府三十二年九月十七日除尙書戶部侍郎仍兼知府事隆興元年正月十八日罷

林安宅

隆興元年正月十八日左朝請大夫尙書左司郎中林安宅除直顯謨閣知臨安府是年五月二十九日除主管台州崇道觀

陳輝

隆興元年六月二日以右朝議大夫直秘閣兩浙轉

運副使陳輝兼權知臨安府是年七月三日除直敷
文閣知府事二年四月四日改知建甯府
避家諱自陳政知湖州

黃仁榮 再除

隆興二年四月初八日以右中奉大夫直敷文閣兩
浙轉運副使黃仁榮知臨安府是年十一月二十六
日罷

吳芾

隆興二年十一月二十六日左朝議大夫試尙書吏
部侍郎吳芾除敷文閣直學士知臨安府是年十二
月初五日復爲吏部侍郎

薛良朋

隆興二年十二月初五日
以左朝奉大夫直顯謨閣
兩浙轉運副使薛良朋
知臨安府乾道元年七月
十八日以警戢盜賊究心
職事除直龍圖閣二年五
月十一日除權工部侍郎

王炎

乾道二年五月十一日
右朝奉大夫兩浙轉運副使
王炎除直敷文閣知臨安
府十二月十三日以職事
修舉除授秘閣修撰三年
五月二十六日除敷文閣
待制知荆南府

周淙

再除

乾道三年五月二十六日以右朝奉大夫直龍圖閣

兩浙轉運副使周淙知臨安府

先是紹興二十五年嘗通判府事

至

乾道五年二月十五日以職事修舉除秘閣修撰乾道四年十一月十四日磨勘轉右朝議大夫五年七月初四日除右文殿修撰再任

道光間錢塘汪氏振綺堂校刊宋本潛氏咸淳臨安志
讀黃氏士珣札記知曾取乾道淳祐二志參校惜其不
并刻二志豈以其殘闕過甚抑所載者已具咸淳志中
耶夫志乘當詳固矣然考古者徵引事實必以始出者
爲據二志雖殘實爲咸淳志所採用創始之功不可沒
也會稽章碩卿大令得鈔本乾道志三卷於京師藏書
家爲故學師嘉興家警石先生校本攜歸蜀中刻之屬
爲校勘今審其確爲鈔本誤而校本是者鈔本脫漏而
校本完善者悉從校本補正有兩通者錄其校語於札
記中標曰原校保塘所校者中以按字別之潛志所載
乾道志佚文數條並爲補入周志原文間有誤處有可

審其歧異之由者並據他書詳加辨證以備修郡志者
抉擇焉原書每葉十八行行二十字遇宋帝詔旨等字
均提行空格稱孝宗爲今上光宗以下諱均不避蓋卽
從書成後初刻本輾轉影鈔者也光緒四年八月海甯
錢保塘識

卷一 九宮壇歲祀九宮貴神 輿地紀勝一引作歲
祀太一攝提權主招搖天爵青龍咸池太陰天乙等九
宮貴神按輿地紀勝成於嘉定中所引臨安志諸條均
與周志同當卽周志之文惟此條歷載九宮貴神之名
疑紀勝兼取臨安志他卷之文彙括成之故較詳耳餘
所引與周志文同者不記

晨華館 輿地紀勝一引作神華館按潛志亦作晨華館與此合今從之

左右金吾衙仗 原校衙作街

卷二 因爲縣焉 原校一本作因立爲縣

龍德三年 潛志作龍德二年

淳化五年陞南新場爲昭德縣六年改爲南新縣 太平寰宇記南新縣本臨安縣地乾德五年錢氏割臨安縣地置南新場以便徵科太平興國六年改爲南新縣 輿地紀勝嚴州分水縣寶應二年析置昭德縣大曆六年省昭德入分水潛志淳化六年置南新縣本嚴州分水縣東境唐寶應置爲昭德縣大曆併入分水縣梁正

明四年以民戶之請隸安國縣乾德間卽其地置場催
科名曰南新至是陞爲縣按此則昭德本唐縣宋因其
名復立之耳元豐九域志淳化五年以南新場爲昭德
縣六年改昭德爲南新縣此周志所本也然淳化止五
年次年正月改元至道二志皆言淳化六年改南新縣
恐承九域志之誤昭原誤作紹今更正

唐景福二年 唐原誤作後周今據通鑑更正

戶口 按潛志載乾道志云錢塘縣主客戶四萬六千
五百二十一口六萬八千九百五十一仁和縣主客戶
五萬七千五百四十八口七萬六千八百五十七餘杭
縣主客戶一萬九千八百一十七口二萬九千九百一

十一臨安縣主客戶二萬四千二百六十一口四萬四千七百四十二於潛縣主客戶二萬二千九十五口四萬六千二百九十二富陽縣主客戶一萬九千九百二十三口三萬六千一十七新城縣主客戶一萬二千四百八十三口三萬六百五十一鹽官縣主客戶五萬八百三十一口五萬九千三百四十四昌化縣主客戶一萬一十三口一潛志黃氏札記云一成化志作五是也萬四千三十三此本佚之今補入惟九縣戶數合計之適合二十六萬一千六百九十二之數口數合計止四十六萬五千九百五十九較總數尙少八萬六千六百四十八卽昌化縣口數依成化志作五萬亦少四萬六千六百四十八以

卷之三十一
 七
 已

鹽官戶口計之口僅多六分之一是一縣有五萬八百餘家單丁也其爲脫誤顯然以此推之諸縣口數亦尙有誤處

禁軍 威捷第一指揮以下八行原頂格書依前後體例當移低一格潛志亦如此今從之

清河坊 河原誤和今據潛志更正注同

延福坊 潛志作賢福坊

壩東巷 壩原誤灞今據潛志更正下同

苦棟皮 潛志棟作練

箬 原校一作箬按箬竹名見玉篇廣韻潛志作苦

仁和館湯鵬舉重建 原校一本無重字

適 原校改作邁按邁爲高宗嫌名故書字不成今從
之下同

一時名流皆有詩 此下原有後人以爲酒名六字原
校引吳兔牀騫云以爲酒名四字疑後中和堂下注誤
重按其說是也今從之並去後人二字

斯堂偉特之觀 斯堂本作登斯原校云一本作斯堂
按潛志亦作斯堂今從之

虛白堂晏殊輿地志云爲刺史 爲刺史上疑脫宋璟
二字見輿地紀勝一引晏公類要

卷三 宣祖廟諱下一字 本作上一字接以大書亮
字按宣祖廟諱下一字爲殷潛志有殷亮卽其人也今

據更正

李白挹 潛志作士挹

相里尹造 潛志作相里君引白居易冷泉亭記有相里君造虛白亭或云相里君名造未有的據不列於表按白記語意蓋不以造字爲名此尹字當是君之誤容齋五筆有相里造與魚朝恩辨論事恐別是一人

柳沖楊憑 潛志牧守表列唐刺史較周志增多二十二人惟此二人潛志無之

周寶爲杭州刺史後唐僖宗時羣盜起寶募諸縣鄉兵討之號八都兵見五代史 按吳越備史新唐書通鑑乾符六年周寶以涇原節度使爲鎮海節度使光啟三

年軍亂爲部將薛朗所逐奔常州錢武肅王遣將杜稜拔常州迎寶歸杭州十二月寶卒未嘗爲杭州刺史也五代史亦無寶募諸縣鄉兵討賊號八都兵之事惟新唐書寶傳稱僖宗時羣盜所在盤結寶練卒自守發杭州兵戍縣鎮判八都此周志誤列寶爲杭州刺史之由也唐制節度使所治之州卽兼其州刺史是時鎮海軍節度使治潤州兼領潤州刺史而杭州爲其巡屬寶至杭州時武肅方爲杭州刺史故屬橐鞬具部將禮迎之武肅旣克常潤景福二年授鎮海軍節度潤州刺史乾甯三年平董昌於越州兼領鎮東節鉞次年賜鐵券文結銜稱鎮海鎮東等軍節度潤越等州刺史以鎮東治

越州故也然是時常潤二州為淮南所據光化元年因請移鎮海軍於杭州自是中朝制冊至吳越遂稱兼杭

越等州大都督府長史或杭越等州刺史至五代不改

見吳越備史及增訂本周志見寶為鎮海節度以為當兼領杭州

刺史故列其名於牧守中潛志郡守表亦有寶名蓋沿

周志之誤也當去寶而列董昌昌於中和元年八月據

杭州寶承制表昌為杭州刺史至光啟三年命武肅平

劉漢宏徙鎮越州昌即表武肅為杭州刺史見吳越備

史五代史通鑑諸書潛志牧守表補昌名是也又按通

鑑中和元年八月杭州刺史路審中將至官行至嘉興

董昌自石鏡引兵入杭州審中懼而還昌自稱杭州都

押牙知州事遣將吏請於周寶寶不能制表爲杭州刺史周志是卷列牧守之名凡已除而未行者亦列之則亦當補路審中名

邕州觀察使劉知信 潛志作亳州

張詠爲工部郎中 原校一本作侍郎按潛志作侍郎

馬亮執役水中 原脫水字今據潛志補

孫沔皇祐五年四月壬午 原作壬子按是月爲庚午

朔不得有壬子潛志作壬午是也今據更正

唐詢除吏部郎中 原校一本作禮部按潛志亦作吏

部

張詵元豐四年 原作二年潛志作四年按上稱鄧潤

甫元豐二年知杭州四年四月徙知成都則二當作四
今據更正

呂公孺 原校呂公孺至熊本初除舊鈔本缺今據海
昌吳氏蔣氏藏本補

陳軒龍圖閣待制 制原誤作詔今據潛志更正

豐稷元符二年 原脫二字今據潛志補

王渙之 潛志作煥之

趙霰 原校一本作趙霆按潛志亦作霆

徽猷閣待制季陵 原脫徽猷二字今據潛志補

孫覲紹興元年正月三日 原作三月三日按潛志是
年正月三日李光徙知洪州繼之以是日孫覲知則作

正是也今據更正

宋輝紹興二年正月十八日 原作十六日按上文席

益以是年正月十八日徙知衢州則六當作八潛志亦

承上文云是日云云今據更正

蔣燦 原校一本作蔣璨按潛志亦作璨

趙士彰 原校一本作彰一本作彰按潛志亦作彰

錢端禮再除以右中奉大夫知 潛志作太中大夫

周淙再除以右朝奉大夫知 潛志右朝請大夫按是

節敘淙於乾道五年二月除秘閣修撰繼之以乾道四

年十一月轉右朝議大夫又繼之以五年七月除右文

殿修撰再任淙自敘其官不應錯互其年之先後非後

人有所攙入卽傳鈔有誤也潛志稱淙於乾道三年五月二十六日知四年十一月十四日轉右諫議大夫五年二月十五日以職事修舉除秘閣修撰七月初四日除右文殿修撰再任敘次先後不誤

錢蘇字岳甫

一作岳仲

以孝義知名居於錢塘門外九里松

之間嘗建傑閣藏書甚富蘇軾榜曰錢氏書藏仕至直秘閣知荆南府墳墓在靈隱天竺兩山之間 謝景初字師厚慶歷六年甲科及第直講梅堯臣作詩美之以大理評事知越州餘姚縣作海塘防水患民賴以安業王安石嘗記其事累遷益州提點刑獄以屯田郎致仕性侷儻勁峭博學能文尤長於詩子壻黃庭堅以詩名

家庭堅自謂從謝公得句法 俞舉善錢塘人累世同居號義門明道二年旌表門閭 按潛志云輒給公乾道志入姓氏朱异沈括入人物沈衍作沈衍以晉孫拯係吳又人物列傳於錢暄錢彥遠錢明逸錢勰薛温元德昭元奉宗元絳盛度謝濤楊蟠强至周邠虞奕吳師禮崔貢孝婦盛氏諸傳下皆云以他書及乾道志修惟錢獻謝景初俞舉善傳祇云以乾道志修則三傳爲此志原文也因補錄於此

草履臣等言

ノ